

## Sunnigiffimmi angallatini umiartornermi isumannaallisaaneq kiisalu sunngiffimmi angallatini 24 meterit sinnerlugit takissusilinni isumannaallisaanermut piumasaqaatit pillugit nalunaarut<sup>1)</sup>

Imarsiornerup isumannaatsuunissaa pillugu inatsimmi § 1, imm. 2, § 3, imm. 1, § 4, imm. 1 aamma § 32, imm. 10 malillugit, tak. inatsimmik nalunaarut nr. 221, 11. februar 2022-meersooq, allanngortinneqartoq inatsisikkut nr. 1773, 28. december 2023-meersukkut, aamma § 1, imm. 2, § 3, imm. 1, § 4, imm. 1, aamma § 32, imm. 2, imarsiornerup isumannaatsuunissaa pillugu inatsisip Kalaallit Nunaannut atuutileraneranut peqqussut, tak. peqqussummut nalunaarut nr. 1674, 16. december 2015-meersooq, pisinnaatitsinerit naammagittaalliorsinnaanerlu il.il. pillugit Søfartsstyrelsenimut tunniunneqarnissaat pillugit nalunaarummi nr. 261, 23. marts 2020-meersumi § 1, imm. 1, nr. 3-mi pisinnaatitsineq malillugu, aamma pisinnaatitsinerit naammagittalliorsinnaanerlu il.il. pillugit Søfartsstyrelsenimut tunniunneqarnissaat pillugit Kalaallit Nunaannut nalunaarut nr. 279, 23. marts 2020-meersumi § 1, imm. 1, nr. 2 malillugu aalajangersarneqarpoq:

### *Atuuffii aamma nassuiaatit*

§ 1. Allamik ersarissumik aalajangiisoqarsimanngippat, nalunaarummi uani aalajangersakkat, sunngiffimmi angallatinut nutaanut pioreersunullu, 24 meterit ataallugit takissusilinnut L atuuppoq.

*Imm.* 2. Nalunaarut aammattaaq sunngiffimmi angallatinut 24 meterit sinnerlugit takissusilinnut L 1. januar 2004 sioqqullugu sananeqarsimasunut atuuppoq.

§ 2. Nalunaarummi uani tulliusut ima paasineqassapput:

- 1) Sunngiffimmi angallat: Angallat, qanorluunniit ittumik siumut ingerlatitsinerimut atortoqaraluarpuunniit timersornermut imaluunniit sunngiffimmi siunertamut atorneqartoq, aamma inuussutissarsiornermik siunertanut atorneqanngitsoq. Nalornisoqartillugu Søfartsstyrelsenip angallat sunngiffimmi angallatit isigineqarnersoq aalajangertarpaa.
- 2) Angallatit nutaat: Sunngiffimmi angallatit, tuniniaanissamik pilerisaarutigineqarsimasut imaluunniit 16. juni 1998-imi kingusinnerusukkulluunniit atorneqalersimasut.
- 3) Angallatit pioreersut: Sunngiffimmi angallatit, angallatit nutaajunngitsut.
- 4) Sunngiffimmi angallatinut malitassaq: Sunngiffimmi angallatit aamma nammineq angallatigisat pillugit, aamma malitassap 94/25/EF-p atorunnaarsinneqarnera pillugu Europa-Parlamentip aamma Rådip malitassaat 2013/53/EU, 20. november 2013-meersooq, kingusinnerusukkut allannguutitalik.
- 5) Takissuseq L: umiarsuup qeqqani kujaap titarneranit uuttortarlugu (moulded) itissutsip ikkannerpaaffiata 85 pct-iani angallatip immamut killingata tamakkerlugu takissusaata 96 pct.-iatut naatsorsorneqassaaq, imaluunniit immap killingani, takissuseq taanna takinersaappat, taaneqartumi angallatip siuanit aquutip ikkusimaffiata kaaviffiata qiterisaanut takissusertut naatsorsorneqassaaq.

---

<sup>1)</sup> Nalunaarut nr. 1687 12/12/2016-meersooq, matuma nalunaarutip taarsigaa, missingiutitut nalunaarutigineqarsimavoq Europaparlamentip aamma Rådip tekniskiusumik malitassat kiisalu paasissutissiisarfiit sullissinerat (kodifikation) pillugit paasissutissiisarnermut periaaseq pillugu malitassaat EU 2015/1535, 9. september 2015-meersooq malillugu.

Angallatini aquata siuatalu itsernganni nikingasoqartillugu, angallatip immamut killingani takissusseq uuttortarneqartoq, immap killinganut titartarneqarsimasumut assingussaaq.

- 6) Kattuffik akuerisaasoq: Søfartsstyrelsenip suliffeqarfiisa ilaat akuerisaq, Søfartsstyrelsenip kattuffinnik umiarsuarnik ornigullutik takusaajartortartunut misissuisartunullu akuersissuteqartarnerannut aamma atortuulersitsisarnerannut nalunaarutai malillugit, Søfartsstyrelseni sinnerlugu suliassanik suliaqartartoq.

*Sunngiffimmi angallatit annerusut sananeqarnerannut, atortussaannut, misissorneqartarnerannut, nalunaarsorneqartarnerannut aamma akuersissutigineqartarnerannut piumasaqaatit*

§ 3. Sunngiffimmi angallatit 24 meterinik sinnerlugillu takissusillit L, 1. januar 2004 sioqqullugu kujaalernerqarsimasut, aamma ajugaanniulluni umiartornermut taamaallaat atugassatut sanaajusimanngitsut, sananeqarnerannut, atortussaannut, misissuisarnermut, nalunaarsorneqartarnerannut aamma akuersissutigineqartarnerannut piumasaqaatinut, ilanngussaq I-imi allassimasunut piviusunngortitsisussanut ilaapput.

*Isumannaallisaanermut atortussanut il.il. piumasaqaatit*

§ 4. Sunngiffimmi angallatit tamarmik isumannaallisaanermut atortussanik pisariaqartunik pilersorneqarsimassapput, ukiup kaajallakkiartornerani ukiup ilaani silami pissutsit, angallatip qanoq ittuussusaa, angissusaa, aaqqissuunneqarsimanera aamma atorneqartarnera kiisalu angalanerup ungasissusaa aamma sivisussusaa apeqqutaatillugit.

§ 5. Sunngiffimmi angallatit tamarmik, umiarsualivimmi pitussimanngitsut, puttaqutinik imaluunniit aaqanngitsunik puttaqutinik eqqortumik angissusilinnik inunnut tamanut angallammiittunut nassartassaaq, taamaattorli tak. imm.3 aamma 4. Puttaqutit aamma aaqanngitsut puttaqutit SOLAS-imit imaluunniit EU-suussutsimut akuerisimasuussapput, aamma Rat-meqqinik <sup>2</sup> imaluunniit CE-meqqinik meqqilerneqarsimassallutik.

*Imm. 2.* Angallatip naalagaata akisussaaffigaa, inunnut tamanut ataasiakkaanut angallammiittunut eqqortumik angissusilinnik akuerisaasimasunik puttaquteqarnissaa imaluunniit aaqanngitsunik puttaquteqarnissaa.

*Imm. 3.* Unamminerni, tatsini aamma immani timersornermi angallatip aquttuata tatsini immamiluunniit timersornermut kattuffiit naleqquttut isumannaallisaanermut aalajangersagaat malissallugit toqqarsinnaavai, imm. 1 malillugu siunertarineqartumi isumannaallisaanermut assinguppata.

*Imm. 4.* Aqqartartut, angallatini nalunaarummi uani pineqartuni angallanneqartut, aaqanngitsut qaffassaatit, aqqartartut atortussaanut ilanngullugit atorneqartartut atorsinnaavaat puttaqutinut imaluunniit aaqanngitsunut puttaqutinut taarsiullugit.

*Imm. 5.* Angallatit, nuannaariartarfinni assigisaanilu ikkattuni nakkutigineqarlutik atorneqartartut, Søfartsstyrelsenimit akuersissuteqareernikkut, nalunaarutip uuma piviusunngortinnissaanut pisussaajunnaarsinneqarsinnaapput.

---

<sup>2</sup> Bekendtgørelse nr. 422 af 17. maj 2016 om udstyr i skibe

*Imm. 6.* Angallatip aquttuata akisussaaffigaa, puttaqutit imaluunniit aaqanngitsut puttaqutit ataasiakkaat atorpeqarnissaannut aamma oqimaassutsikkut killissaannut innersuussutit malinneqarnissaat.

**§ 6.** Sunngiffimmi angallatit tamarmik, sunngiffimmi angallatinut aamma nammineq angallatigisanut nalunaarummut nr. 1689, 15. december 2015-imeersumut ilaanngitsut, kisianni nerisassiornermut, kiassaanermut imaluunniit nillarsaatinut gassitortunik atortuutilersorneqarsimasut imaluunniit spritti imaluunniit petroliu atorlugu nerisassiornermut sakkuutinik atortuutilersorneqarsimasut, ilanngussaq II-mi allassimasunut gassitortumik atortuutilersorneqarsimasunut piunasaqaatinik piviusunngortitsisussanut ilaapput.

**§ 7.** Søfartsstyrelsenip, qinnuteqartoqareernikkut, sunngiffimmi angallat tamarmiusumik imaluunniit ilaannakortumik isumannaallisaanermut nalunaarummi uani aalajangersakkanit malinninnginnissaanik akuerisinnaavaa. Taamaattorli Søfartsstyrelsenip piviusoq aalajangersimasoq tunngavigalugu nalileereernerata kingorna angallatip sukkassusissaatut aalajangiunneqarsimasumut naleqquttut sunngiffimmi angallatit taamaattut tamarmik isumannaallisaanermut piunasaqaatit, aamma angallatip nalinginnaasumik isumannaatsuuneranik qulakkeerinnittussat piviusunngortissavaat.

*Assigiissaakkamik illersuinermit qaffasissuseq aamma pitsaassutsimik misilittaanermut aalajangersakkat*

**§ 8.** Aalajangersakkat nalunaarummi uani piunasarippassuk, pisataq, atortussaq, atortoq imaluunniit sakkuut, imaluunniit taakkununga assingusut, angallammi ikkunneqassasut imaluunniit nassaarineqarsinnaassasut, Søfartsstyrelsenip qinnuteqartoqareernikkut akuersissutigisinnaavaa, pisataq alla, atortussaq alla, atortoq alla imaluunniit sakkuut alla, imaluunniit taakkununga assingusut angallammi ikkunneqarnissaat imaluunniit naassarineqarsinnaanissaat, imaluunniit angallammik pitsaassutsimik misiliinermi arlaatigut uppersarneqarsinnaappat, pisataq taamaattoq, atortussaq taamaattoq, atortoq taamaattoq imaluunniit sakkuut taamaattoq, imaluunniit taakkununga assingusut, imaluunniit aqqissutit, aalajangersakkani taakkunani anguniarneqartut assinganik illersorneqarsinnaasumik qaffasissusilimmik qulaakkeerinnissinnaappata.

*Imm. 2.* Søfartsstyrelsenip misileraanerit, suliffeqarfinit misileraasartunit akuerisaasunit ingerlanneqartut, matumani suliffeqarfinit misileraasartunit EU-mut ilaasortanit naalagaaffinni allaneersunit kiisalu nunani EØS-imut isumaqatigiissummut ilaasortanit imaluunniit Tyrkiamit ingerlanneqartut, aamma teknikkikkut, suliatigut aamma arlaannaannulluunniit suussusilitsigut naleqquttunik naammaginantumillu qulakkeerinnissinnaasut akuerisarpai.

**§ 9.** Akuersissutit § 5, stk. 4, § 7 aamma § 8 malillugit atulersinneqarsimasut Akuersissutit politiinit imaluunniit pisortanit allanit attuumassutilinnit piunasarineqarpat takutinneqassapput. Akuersissut Søfartsstyrelsenimit utertinneqassaaq, pissutsit taamaaliornissamut pissutissaqartitsippata.

## *Pillaaneq*

§ 10. Nalunaarummi uani §§ 3-8-nik unioqqutitsineq akiliisitsinikkut imaluunniit ukioq ataaseq tikillugu parnaarussaannermik pillarneqartarpoq.

*Imm.* 2. Pillaaneq parnaarussivimmi ukiuni 2-ni paarnaarussinermut qaffanneqarsinnaavoq, imaattoqarpat

- 1) unioqqutitsinermi inuunermik peqqissutsimilluunniit ajoqusiisoqarsimappat imaluunniit taakkunnga ulorianartorsiortitsimagaanni
- 2) siusinnerusukkut pissutsit taamaattut imaluunniit assingusut pillugit inerteqqummik tunniussisoqarsimappat imaluunniit peqqussuteqartoqarsimappat, imaluunniit
- 3) unioqqutitsinikkut imminut allanulluunniit aningaasaqarnikkut iluanaaruteqartitsisoqarsimappat imaluunniit

*Imm.* 3. Inuusuttut 18-it ataallugit ukiullit inuunerannik imaluunniit peqqissusaannik ajoqusiisoqarsimappat imaluunniit taamaalisoqarnissaanut ulorianartorsiortitsisoqarsimappat immikkut ittumik pissutsitut sukanninnerulersitsisutut isigineqassapput, tak. imm. 2, nr. 1.

*Imm.* 4. Unioqqutitsilluni iluanaarutaasimasumik arsaarinnittoqanngippat, taava akiliisitsissutissap annertussusilerneqarnerani, matumani akiliisitsissummut ilassut ilanngullugu, taava aningaasaqarnikkut iluanaaruteqaataasimasup annertussusaa imaluunniit taama annertutigisumik iluanaaruteqarnissamik siunertaasimasup annertussusa immikkut ittumik isiginiarneqassaaq.

*Imm.* 5. Ingerlatseqatigiiffiit il.il. (ataatsimoortutut inatsiseqartitsinikkut nammineertut) pinerlunnerit pillugit akisussaaffilerneqarsinnaapput, pinerluttunik eqqartuussisarnermik inatsimmi kapitali 5-imi malittarisassat malillugit.

§ 11. Pisoq Imarsiornerup isumannaatsuunissaa pillugu inatsisip Kalaallit Nunaannut atuutilersinneqarneranut peqqussummut ilaappat, taava Kalaallit Nunaanni pinerluttulerinermut inatsit malillugu pineqaatissiisoqarsinnaavoq.

*Imm.* 2. § 10-mi, imm. 2 aamma 3-mi pissutsit taaneqartut pissutsitut sukanninnerulersitsisutut isigineqassapput.

*Imm.* 3. Unioqqutitsinermi iluanaarutaasimasumik aarsaarinnittoqanngippat, tak. pinerluttulerinermi inatsimmi kapitali 3, taava akiliisitsissuttip annertussusilerneqarnerani, matumani akiliisitsissummut ilassut ilanngullugu, aningaasaqarnikkut iluanaaruteqaataasimasup annertussusaa imaluunniit taama annertutigisumik iluanaaruteqarnissamik siunertaasimasup annertussusa immikkut ittumik isiginiarneqassaaq.

*Imm.* 4. Naalagaaffimmit, Namminersorlutik Oqartussanit, Kommunalbestyrelsinut, nunaqarfinni aqutsisunut il.il pillugit Inatsisartut inatsisaanni § 64-imut ilaasumit kommunimit, kommunimi ataatsimooqaatigiinnit imaluunniit nunaqarfinni aqutsisunit unioqqutitsisoqarsimappat, taava pisortani oqartusaaq pineqartoq akiliisitsissummut akisussaaffilerneqarsinnaavoq.

*Imm.* 5. Pineqartoq Kalaallit Nunaanni najugaqanngippat, imaluunniit kalaallit inuiaqatigiivinut annikinnerusumik attuumassuteqarpat, aamma pineqaatissinneqarnissamut tunngavissat atorsinnaanngippata, suliaq Danmarkimi suliarineqarsinnaavoq imaluunniit suliarisassanngortillugu innersuunneqarsinnaalluni, tak. Kalaallit Nunaanni pinerluttulerinermut inatsimmi § 7.

## *Atuutilersitsineq*

§ 12. Nalunaarut ulloq 1. juli 2024 atuutilersinneqarpoq.

*Imm. 2.* Sunngiffimmi angallatinik umiartornermi isumannaallisaaneq kiisalu sunngiffimmi angallatini 24 meterit sinnerlugit takissusilinni isumannaallisaanermut piumasaqaatit pillugit nalunaarut nr. 1687, 12. december 2016-imeersoq atorunnaarsinneqarpoq.

*Søfartsstyrelsen, ulloq 20 juni 2024*

Martin Hvid John

/ Malene Loftager Mundt

**Sunnigiffimmi angallatit annerusut ilaasa sananeqaataat, sananeqarneri aamma atortussat il.il.**

### **Immikkoortortaq A Nalinginnaasumik**

#### **Malittarisassaq 1 Atuuffii**

1 Kapitalimi uani aalajangersakkat sunnigiffimmi angallatinut 24 meterinik sinnerlugillu takissusilinnut, ulloq 1. januar 2004 sioqqullugu kujaalernerqarsimasunut, aamma ajugaanniulluni umiartornerinnarmut atorreqartussatut sananeqarsimanngitsunut atuupput.

#### **Malittarisassaq 2 Nassuiaatit**

Kapitalimi uani nassuiaatit tulliusut atuupput:

1 Tons: Usitussuseq tamarmiusoq (GT) umiarsuit uttortarneqartarnerat pillugu aalajangersakkat atuuttut malillugit uttortarneqarsimasoq; umiarsuarnut 24 meterinik sinnerlugillu takissusillinnut nunat tamalaat akornanni umiarsuit uttortarneqartarnerannut isumaqatigiissut 1969-imeersoq malillugu. Umiarsuarnut ulloq 18. juli 1994 sioqqullugu sananeqarsimasunut, nunat tamalaat akornanni umiarsuit uttortarneqartarnerannut isumaqatigiissutip 1969-imeersup atuulinnginnerata siuliani, umiarsuarnik uttortaasarnermut malittarisassat malillugit uttortarneqarsimasunut, aamma usitussuseq taanna nunat tamalaat akornanni uttortaaneq pillugu allakkani (1969) allassimasoqartillugu, usitussuseq taanna aalajangersakkanut taakkununga tunngatillugu atorreqartarpoq. Umiarsuarnut 24 meterit ataallugit takissusilinnut, taamaallaat siusinnerusukkut (1974) uttortaaneqartarnermut malittarisassat atorlugit uttortarneqarsimasunut, bruttoregister-tonnage (BRT) usitussuseq atorreqartarpoq. Umiarsuarnut, timitaanut/napparutaanut/allunaasaqutaanut/tingerlaataanullu akuersissuteqartuni, akuersissutaanni usitussutsinik marlunnik imaqartunik, oqariartaaseq angallatip timitaanut/napparutaanut/allunaasaqutaanut/tingerlaataanullu akuersissummi allassimasutut usitussutsitut annerpaatut paasineqassaaq.

2 Klassi umiarsuarmut, maskiinamik atortuutileriffimmut il.il. atorreqartoq: - Uumiarsuaq imaluunniit atortuut il.il., Søfartsstyrelsenimit akuerisaasumit kattuffimmit atuuttumik akuersissutilik.

3 Umiarsuup saneraata immap killingata qulaaniittoq qaaq, ima paasineqassaaq, umiarsuit naqqani qanoq appasitsigisumik usilersorsinnaanerit pillugu isumaqatigiissut qaqukulluunniit atuuttoq malillugu nassuiarneqarsimasutut paasineqassaaq.

4 Sisak imaluunniit atortussaq assingusoq: »assingusoq atortussaq« ima paasineqassaaq atortussaq sunaluunniit, immini imaluunniit ikiaqutissamik ikiaquserlugu ikuallannissamat sungiusaaffigineqareerluni sisattut akiuunnermut piginnaasalittut isigineqartoq (ass. aluminium naleqquttumik ikiaqusigaq).

5 Atortussat ikuallasinnaanngitsut atortussaapput, ikuallasinnaanngitsut imaluunniit aalanik allaat 750° C-t missaannik kissasserneqarsimasunik aniatitsisimagaluarunilluunniit innermik ikinneqarsinnaanngitsut. Atortussat allat tamarmik »atortussaapput ikuallasinnaasut«.

6 Init nalinginnaasumik iserfigineqarsinnaasut tassaapput init angallatip iluata ilai, torsuusatut, nerisarfittut, isersimaartarfittut imaluunniit assingusumik initut atajuartumk talulersorneqarsimasutut atorreqartut.

7 Angallatip iluani nalinginnaasumik iserfigineqarsinnaasut tassaasut init, torsuusat, anartarfii, ineeqqat, allaffiit, inuttat inaat, sassaalluutissanik ilioraaviit aamma oqorutissaasiviit kiisalu init assingusut.

8 Maskiinat inai tamarmik tassaapput, siumut ingerlatitsinermut atortunut, maskiinanut ikiuutitut imaluunniit maskiinanut nillartaartitsartunut, uunnaavinnut, pumpinut, sullivinnut, generatorinut, silaannalersuutitut aamma silaannarissaatinut maskiinanut, aamma uuliamik immiiffittut atorineqartartut, init assingusut kiisalu init taamaattut matui.

9 Init, angallammiittut isersimaartarfittut atoruminartumik aaqqissuunneqarsimasut, nassataasivittut, nerisassaasivittut, allunaasaqarfittullu aaqqissuussaangitsut.

## **Immikkoortortaq B Misissuineq akuersissutillu**

### **Malittarisassaq 3 Ornigulluni takusaaneq misissuinerlu**

1 Ornigulluni takusaaneq misissuinerlu Søfartsstyrelsenimit ingerlanneqartarpoq. Taamaattorli Søfartsstyrelseni ornigulluni takusaaneq misissuinerlu nakkutilliiartortartunut toqqarneqarsimasunut imaluunniit klassinut immikkoortiterisartut ingerlatsivinnut akuerisanut suliaassanngortillugu tunniussinnaavaa.

2 Sunngiffimmi angallatit tamarmik uani kapitalimi aalajangersakkanut ilaasut siullermik angalaalinninnerminni Søfartsstyrelsenimit misissorneqaqqaarlutik akuersissutigineqarsimassapput. Umiarsuarnut nunanit allanit pisiarineqarsimasunut Søfartsstyrelsen tamanna pillugu najoqqutassanik aalajangersaasinnaavoq.

3 Umiartortoqassanngilaq, Søfartsstyrelsenimit, imaluunniit taanna sinnerlugu, angalasinnaanermut akuersissutigineqarsimasooq atorunnaarsimappat, imaluunniit misissuineq aalajangersarneqarsimasooq ingerlanneqarsimangippat.

### **Malittarisassaq 4 Immikkut ittumik misissuineq aamma piffissat misissuiffissat**

1 Søfartsstyrelsenip piffissami sumiluunniit peqqussutigisinnaavaa angallat immikkut ittumik misissuiffigineqassasooq, aamma pissutsini immikkut ittuni piffissat misissuiffissat, Malittarisassaq 5-imi piffissanit misissuiffissanit allaanerusut aalajangersarsinnaallugit.

2 Angallatit amuneqarsimasut pillugit nutaamik misissueqqittoqassanngitsoq imaluunniit ilaatigut misissuisooqassanngitsoq Søfartsstyrelsenip akuerisinnaavaa, umiarsuaq amuneqarsimaannassappat.

3 Suli allamik misissuisooqaqqissaaq, nutaamik misissueqqinnermik imaluunniit ilaannakortumik misissueqqinnermik, taanna pissutsit naapertorlugit, iluarsaassinerit, sanaqqiinerit, allanguinerit imaluunniit nuternerinit kingorna ingerlanneqaqqissaaq.

4 Angallatit, allannngortillugit sananeqartut, napparutai iluarsaanneqaqqittut imaluunniit allatut ima annertutigisumik allannngortinneqartut, Søfartsstyrelsenip naliliinera malillugu angallatip nukittussusaa imaluunniit orrajaannera annikillisinnaasooq, taakku orrajaanermut aamma nukittussutsimut tunngasut misissoqqinneqassapput. Taama naliliinermut ilaasinnaapput uuttortaanerit aamma naatsorsuinerit, Søfartsstyrelsen isumaqarpat taakku pisariaqartinneqartut.

### **Malittarisassaq 5 Sananeqaammik, maskiinanik, atortussalersuutinik aamma annanniutinik misissuineq**

1 Sunngiffimmi angallatit, Malittarisassaq 1-imi allaaserineqartut, sananeqaataat, maskiinaat, atortussalersorneqarsimanerat aamma annanniutaat pillugit tulliuuttunik misissuiffigineqassapput:

- 1.1 Misissuineq siulleq, angallat angalaalersinnagu, silataagut naqqanik misissuineq ilanngullugu.
- 1.2 Nutaamik misissueqqinneq, kingusinnerpaamik ukiunik 5-inik akunnillit.
- 1.3 Angallatip silataagut naqqanik ukiut 5-it ingerlanerini minnerpaamik marloriarluni ornigulluni misissuiartornerit. Ornigulluni misissuiartornerit akunnerisa qaammatit 36-t sukkulluunniit sinnissanngilaat.

## 2 Immikkoortup 1-ip ataani misissuinerit taaneqartut ima ingerlanneqartassapput:

- 2.1 Misissuinermi siullermi sananeqaat, maskiinat aamma atortussalersuutit ilanngullugit tamakkiisumik ornigulluni misissorneqassapput, matumani angallatip silataagut naqqa ilanngullugu. Misissuinermi, aaqqissuinerit, atortussat, atortussat angissusaat aamma sananeqaatip suliarineqarsimanera, uunnaaviit aamma naqitsinermut tankit pisatallit allat, maskiinat pingaernerit ikiuutillu, matumani maskiinaat aquttaatit aamma nakkutilliiffiit taakkununga atasut, atortuutit innaallagiatortut aamma atortussalersuutit allat, najoqqutassani atuuttuni piumasaqaatinik piviusunngortitsisimanersut misissorneqassapput, aamma angallatip atorneqarfissaanut naleqquttumik angallat naammaginartuussasoq aamma sukkassutsimut aalajangiunneqarsimasumut tulluartuuneranik qulakkeerinnissalluni. Aammattaaq ikuallannermut isumannaallisaaneq aamma qatserinermut aaqqissuussinerit aamma qatserinermut atortuutit, annanniutit aamma iliuuserisassatut piareersaatit ornigulluni tamakkiisumik misissuiffigineqaaqissaassapput. Imarsiorneq pillugu saqqummersitat, qulliit, kalerrisaarutitut ilisarnaatit kiisalu siggartaatit kalerrisaarutit aamma ajunaalernerimi kalerrisaarutit qulaani misissuinermit assingusumik misissuiffigineqassapput, malittarisassani piumasaqaatit aamma nunani tamaalani immami aqutini malittarisassanik atuuttunik, taakku atorneqartillugit, piviusunngortitsisimanerat qulakkeerniarlugu.
- 2.2 Nutaamik misissueqqinnerni ilanngunneqassapput sananeqaatip ornigulluni misissorneqarnera, matumani angallatip silataagut naqqa, maskiinat, atortussat aamma atortussalersuutit ilanngullugit, imm. 2.1-mi allassimasutut, malittarisassani taakkunani aamma nunani tamalaani immami aqutitut malittarisassanik piumasaqaatinik piviusunngortitsisimanersut, nammaginartumik pitsaassuseqarnerisut aamma angallammut aalajangiussamat sukkassusermut tulluartuunersut qulakkeerniarlugu.
- 2.3 Angallatip silataagut naqqanik ornigulluni misissuinermi aamma tassunga atatillugu pissutsinik peqatigitillugu misissuinermi, angallatip sukkasusissaatut aalajangiunneqarsimasumut naleqquttuunerat pillugu isumannaallisaanermik qulakkeerinnittoqassaaq. Aquut, sarpiup akselia<sup>3)</sup> aamma immap killingata ataani itinersami immakkut atassuteqaatit misissuinermi ilanngunneqassapput.

## 3 Angallatip silataagut naqqanik ornigulluni misissuisartorneq angallatip sukkassutsimut akuersissutaani allattorneqassaaq.

### **Malittarisassaq 6 Misissuinerup kingorna qanoq-issutsip attatiinnarnera**

1 Angallatit sutigut tamatigut, angallammut imaluuniit angallammiittunut ulorianaatitaqanngitsumik, umiartornissamat naleqquttuujuuaannarnissaa qulakkeerniarlugu, angallat aamma atortussalersuutai aserfallatsaaliorneqassapput, taamaalilluni najoqqutassani atuuttuni aalajangersakkat piviusunngortinneqassallutik.



2 Malittarisassaq 5 malillugu misissuinerup naammassinerata kingorna Søfartsstyrelsen akuersiteqqaarnagu sananeqaammi pissutsinik, maskiinani, atortulersuutini imaluunniit allani ilanngullugit misissorneqarsimasunik allannguisoqassanngilaq.

### **Malittarisassaq 7 Sukkassutsimut akuersissut aamma nakkutilliinermut nalunaarsuiffik**

- 1 Siullermik misissuisoqareerpat, imaluunniit nutaamik misissueqqinnerit kingorna, sukkassutsimut akuersissut, sukkassutsimut akuersissutsip sivisussaa, angallatip angalaffigisinnaasaa aamma angallammi inuit amerlanerpaaffigisinnaasaat ilanngullugit allattorlugit tunniunneqassaaq.
- 2 Sukkassutsimut akuersissut atuutissaaq, angallatip atorneranut aamma piffissat misissuiffissat eqquutsinneqarpata.

### **Immikkoortortaq C Timitaa, napparutit, aamma pisattat**

#### **Malittarisassaq 8 Sananeqaammut malittarisassat nalinginnaasut**

- 1 Umiarsuit tamarmik aaqqissuunneranni tamarmi, nukittussuseq siunertarineqartoq nukittussuserissavaat.
- 2 Umiarsuarmut klassilernerqarsimanngitsumut sananeqaataanut, nukittussusaanut aama atortussartaasa annertussusaanut, allamik aalajangersaasoqarsimatinnagu, klassinut innissititerinermut ingerlatsivimmit akuerisaasumit atorneqartunut malittarisassat nalinginnaasut atuupput, umiarsuit suussusaat aamma atorneqarnerat klassimut ilanngunneqarnissaannut piumasagaatitut.
- 3 Umiarsuarmut klassilernerqarsimasunut imaluunniit umiarsuarmut klassimut ilanngunneqartussatut sananeqartumut, klassip sananeqaammut, nukittussutsimut aamma atortussaata annertussusaannut malittarisassai, atorneqarfiinut naammattutut akuersissutigineqassapput.

#### **Malittarisassaq 9 Umiarsuup saneraani ammarngit**

- 1 Umiarsuup qaavata ataani saneraani ammarngit matunik ussissunik matulersorneqassapput imaluunniit ussissunik matulersorneqarsimassallutik naammattumik nukittussusilinnik.
- 2 Umiarsuup saneraata immap killingata qulaaniittup qaavata ataani imaluunniit usiusaap qulinnguani inini igalaat ammalortut iluatigut peerneqarsinnaanngitsunik anorersuarmut matusartunik iluatigut pilersorneqarsimassapput, imarmut ussissunngorlugit sapernanngitsumik sunniuteqarluartumillu matusinnaasunik. Taamaattorli usiusaani ineeqqani anorersuarmut matusartut ammartartut peerneqarsinnaasut atorneqarsinnaapput.
- 3 Umiarsuup saneraani kuuffiit.

**3.1** Umiarsuup saneraata immap killingata qulaaniittup qaap ataani inini kuuffiit umiarsuarmut imarmik isaatitsinaveersaarutinik sunniuteqarluartunik aamma tikinneqarsinnaasunik atortoqassapput. Kuuffinnut ataasiakkaanut tamanut atorneqassaaq ventili nammineq matusartuq (kontraventil), taanna isumannaatsumik matusinermut pisatsersorneqarsimassaaq, taannalu umiarsuup saneraata immap qaavata killingata qulaaniittup qaavanit imaluunniit maskiinap inaanit ingerlanneqarsinnaassaaq, imaluunniit ventilit nammineq matusartut (kontraventilit) taama matusinermut pisatsersorneqarsimanngitsut, taakku kontraventilit qulaa'tungaat immap qaavata killinga qulaallugu umiarsuarmi ikkunneqarsimassapput, taamaalilluni umiarsuup nalinginnaasumik ingerlanneqartarneranik misissuinermi tamatigut tikinneqarsinnaajuannassalluni, aamma suussusaa nalinginnaasumik matoqqasuaannartuussalluni.

**3.2** Kuuffiit allat, umiarsuarmi, immap qaavata killingani itinersap ataaniippata, umiarsuup saneraani assingusunik nalinginnaasumik anorlersumi naqitsinermiit nammineq ammartartulersorneqarsimassapput. Aaqqiissutini marluusuni, atortup qaavata issussaatut issutigisut ruujorit atorneqarsimappata, taava anartarfinit, asaffinit kiisalu errorsisarfinni natermi kuuffiit assigisaalu anorlersumi naqitsinermiit nammineq ammartartulersorneqarsimasuaannassapput imaluunniit allatut isuguttammit ajoquserneqannginnissamut qulakkeerneqarsimassallutik. Ruujorini taamaattumi issussuseq 14 mm-init issunerusariaqanngilaq.

**4** Ventili toqqaannartumik nammineq matusinermut atortulik ikkunneqarsimappat, sumiiffik, tassuminnga aqutsiffiusoq, tamatigut sapernanngitsumik tikinneqarsinnaasuaannassaaq, aamma atortoqassalluni ventili ammanersoq matoqqanersorluunniit takutitsisinaasunik. Ventilil toqqaannartumik matusinermut atortullit maskiinaq inaanut ikkunneqarsimappata, ikkunneqarsimaffiinit aqunneqartarnissaat naammappoq, sumiiffik qaqugukkulluunniit sapernanngitsumik tikinneqarsinnaappat.

**5** Ventilil tamarmik, umiarsuup saneraata immap killingata qulaaniittup qaavata ataani inissinneqarsimasut, sisaassapput, kanngussaallutik imaluunniit atortussaassallutik allat, manngertut akuerisaasimasut. Savimineq kuisaq nalinginnaasooq imaluunniit assingusoq atorneqaqqusaanngilaq.

#### **Malittarisassaq 10 Umiarsuup saneraata immap killingata qulaaniittup qaava silamut ussinneq**

**1** Umiarsuup saneraata immap killingata qulaaniittup qaava imaluunniit taassuma qulaani qaaq silamut ima ussitsigissaaq, imaq angalanermi pissutsini nalinginnaasuni umiarsuarmut isaasinnaanani.

**2** Qaami silamit anorlerfigittummi ammanerit tamarmik naleqquttunik portussusilinnik nukittussusilinnillu qallersorneqarsimassapput, erngerumillu matusartunik sunniuteqarluartunik ussissunik matunik pilersorneqarsimassallutik.

**3** Usiusaat, umiarsuup qaavaniittut illut aamma sanaartukkat allat kiisalu umiarsuup qaavani anorlerfigittartuni silaannarissarfiit il.il. umiarsuarmut qajannaatsumik attavilerneqarsimassapput aamma pisariaqartinneqartumik nukittussuseqartariaqarlutik

#### **Malittarisassaq 11 Imaarsaatit**

**1** Umiarsuaq naleqquttunik imaarsaanermut pumpinik imaluunniit ininik annerusunik imaarsaasinnaasunik allanik pilersorneqarsimassaaq. Umiarsuaq 50 tons sinnerlugit oqimaassuseqarpat, taava minnerpaamik ataatsimik nammineq maskiinalimmik pumpeqassaaq. Usinit imermik katersuuffiusumik kuuffeqartillugu, taava, taakku ataatsimoorussamik puilasumut kuuffeqanngippata, kuuffiit tamarmik minnerpaamik ataatsimik ledningimik milluaasartulerneqassapput.

**2** Umiarsuit 100 tons sinnerlugit oqimaassusillit minnerpaamik marlunnik maskiinanik ingerlanneqartunik pumpeqassapput, taakkunangalu ataaseq maskiinaq pingaanermit aqunneqarnani nammineq ingerlasinnaassaaq.

**3** Pumpinit tamanit ruujorit, usilersortarfinit imaluunniit maskiinaq inaanit imaajaanermut atorneqartussatut peqqussutaasimasut, ruujorinit immiinermut imaluunniit ininik, imermik uuliamilluunniit assartuinermit atorneqartartunit immikkoortinneqarsimassapput.

**4** Imaarsaanermut atorneqartartut ruujorit tamarmik, aamarsuarnut karsini ataanniluunniit imaluunniit ikummatissamut uuliamut tankini imaluunniit uunnaaveqarfiup imaluunniit maskiinaq inaanit, matumani ininik, ikummatissanut uulianut tankit imaluunniit ikummatissanut uulianut aaqqissuinerit inissinneqarfiiniittut, sisaassapput imaluunniit allaassallutik akuerineqarsimasut.

5 Ledningit milluassutit tamarmik milluaanermut koorinut attaveqassapput.

### **Malittarisassaq 12 Aquttarfik, aqut il.il.**

1 Aquttup inaanit siumut pisariaqartinneqartumik isigisoqarsinnaassaaq.

2 Aqut pitsaasumik aqutsinissamut aamma sangusinnaanisamut pisariaqartinneqartumik inissaqassaaq.

### **Malittarisassaq 13 Napparut pisatalik**

1 Napparut pisatalik illersorneqarsinnaasuusaaq.

2 Sannerutit, bommi illua'tungaanut nuutinneqartartoq il.il.

2.1 Sannerutit, siusaaq bovspryd aamma siusaaq klyverbom, allat napparutit allunaasaqutinillu qajannaarneqarsimannngitsut pinnagit, nalinginnaasumik tingerlaatit suliarineranni qajannaatsunik allunaasaqassaaq nikorfaffigineqarsinnaasunik, matumani assannut talimilluunniit aalajangiussiffiusinnaasunik aamma nikorfaffigineqarsinnaasunik allunaasaqassalluni.

2.2 Sisaat isikkanik nikorfaffigineqarsinnaasut qallerneqarsimassapput.

3 Amoortaateqassappat aamma usingiaanermi atortoqarpat, aalajangersakkat atuuttut innersuussutigineqarput.

### **Malittarisassaq 14 Kisat pisatallit**

1 Umiarsuit tamarmik kisanik aamma kalunnernik imalunniit vaajarinik illersorneqarsinnaasunik pilersorneqarsimassapput.

### **Immikkoortortaq D Maskiinat aamma atortuutit innaallagiatortut**

#### **Malittarisassaq 15 Maskiinanik atortuutileriffiit**

1 Umiarsuit maskiinaannik sanaartornermut aqqissuunneranullu, matumani uunnaaviit aalamut ledninginik tassunga atasunik aamma allanik pisatallit, turbinit, aamma motoorileriffiit kiisalu nillarsanermut atortut pillugit immikkut ittumik nalunaarummik<sup>4)</sup> najoqqutassiisoqartarpoq.

### **Malittarisassaq 16 Atortuutit innaallagiatortut**

1 Atuuffii:

1.1 Immikkoortortami uani malittarisassanut ilaapput atortuutit innaallagiatortut tamarmik, taamattorli atortuutaanngitsut umiarsuarnik siumut ingerlatitsisartut. Atortussat taamaattut ilannguneqarsimannngitsut pillugit ataasiakkaarlugit Søfartstyrelsenimut akuersisummik pissarsiniaqqaartoqarsimassaaq.

1.2 Radiomut atortuutit aamma atortuutit immikkut ittut, immikkut ittumik ilinniagaqarsimasunit ingerlanneqarnissamik pisariaqartitsisut aamma allanik aqunneqaqqusaanngitsut, taamaallat aalajangersakkamut ilaapput, atortuutip innaallagissiorfia ledningitai ilanngullugit aamma ikkunneqarneranut atortui tamaallaat pineqartillugit.

2 Klassinut immikkoortiterisartunut ingerlatsivinnut malittarisassaat:

**2.1** Umiarsuarnut klassilersorneqarsimanngitsunut innaallagiamik atortulersuutitut aamma atortulersuutit ikkussorneqarsimani eqqarsaatigalugit malittarisassat, Klassinut immikkoortiterisartut ingerlatsiviit Søfartsstyrelsenip akuerisimasaasa atortagaannut assingusut atuupput.

**2.2** Umiarsuarnut klassilersorneqarsimasunut innaallagiamut atortulersuutitut aamma ikkussorneqarsimani eqqarsaatigalugit malittarisassat, atortut taamaattut suliarineqartarnerannut atuuttut, atuupput.

## **Immikkoortorta E Ikuallannermik paasisaqarneq qatserinerlu**

### **Malittarisassaq 17 Angallatini 100-nik imalunniit sinnerlugit usitussuseqartuni qatserinermut atortussat**

**1** Umiarsuit tamarmik aaqqissuusaaneri angissusiilu apeqqutaatillugit pisariaqartinneqartunik qatseruteqassapput, taakku umiarsuarmi sumiluunniit sakkortuumik qatserisinnaassapput.

**2** Qatserinermut atortut pumpit.

**2.1** Umiarsuit tamarmik maskiinanik ingerlanneqartunik minnerpaamik marlunnik pumpinik pilersorneqarsimassapput, aappaalu pumpiussalluni ajornartoorfimmi atorneqartussaq. Pumpi ajornartoorfimmi atorneqartartussaq angallattagaassaaq dieselitortoq. Pumpit ima inissinneqarsimassapput, inimi sumiluunniit ikuallannerup pumpit marluutillugit ajortissinnaassanngilai.

**2.3** Pumpit angallattagaangitsut aalajangersarneqarsimasut minnerpaamik akunnermut  $24 \text{ m}^3$  qatserisinnaassapput aamma umiarsuup angissusaanut aaqqissuusaaneranullu naleqquttumik inissinneqarsimassallutik, taamaattorli pumpinit marluusunit 12 mm-iusunit tissaluttaatit nuunit inimi ruujorinut kalaanimit ungasinnerpaamik qatserinermut naqitsineq  $1,6 \text{ kg/cm}^2$  -imit minnerunngitsumik attanneqarsinnaassalluni.

**2.4** Pumpit angallattakkat ima naammassisaqarsinnaassapput, umiarsuit angissusaannut aaqqissuunneranullu tulluartsuussallutik, aamma naammassisaqarsinnaanerit akunnerit tamaasa  $2,6 \text{ kg/cm}^2$ -ini  $24 \text{ m}^3$ -init minnerussanani.

**3.** Ledningit qatserinermut atortut

**3.1.** Ledningip qatserinermut atortup pingaarnep aamma tassunga atasut ledningit immikkoortitsisartut naammattumik sunnuteqarluartumik, ikuallannermut qatserisaatitut pumpit pillugit aalajangersakkat pisinnaasaannik imermik annerpaamik immikkoortiterisinnaassapput.

**3.2.** Ikuallannermut pumpit angallattagaangitsut ledningimut qatserinermut atortumut aalaakkaasumik aalajangerneqarsimassapput, aamma pumpimut angallattakamut attavilernissamut periarfissaqassallutik, tak. 2.3.

**4** Ruujorinut kalaanimit, slangit qatserinermut atortut aamma ruujori tissaluttaat.

**4.1** Ruujorinut kalaanit amerlassusaat aamma inissinneqarfiisa minnerpaamik imermik tissalunnerit, ruujorinut kalaanimit ataatsimeersuunngitsut, aamma taakkunangna ataaseq slangip ataatsip takissusaaneersoq, umiartornermi inuit umiarsuarmiittut nalinginnaasumik tikissinnaasaat angusinnaassavaat.

**4.2** Maskiinap inaani, siumut ingerlatitsinermut maskiinalimmi imaluunniit maskiinanik ikiuutilinni, uunnaavinnut atortuutilinni, ikuallaavilimmi il.il. minnerpaamik ataatsimik ruujorinut kalaaneqassaaq.

**4.3** Angallatip iluani aamma qaavani minnerpaamik pingasunik qatserinermut slangeqassaaq atasunik ikkuffilinnik, ataqaatigiissakkanik tissaluttaatinik ruujoreqassalluni aamma koblinginut sakkussaqaassalluni.

**4.4** Maskiinap inaani ruujorinut kalaanit tamarmik tak. pkt. 4.2 slanginik ataqaatigiissaakkanik tissaluttaatinik ruujorilersorneqarsimassapput.

**4.5** Slangit qatserinermut atortunik illersugaasumik aamma sapernanngitsumik tikinneqarsinnaasunngorlugit ruujorinut kalaaninit ungasinngitsumi inissinneqarsimassapput.

## **5** Qatserinermut atortuutit aalajangerlugit inissitat.

**5.1** Inini, siumut ingerlatitsinermut maskiinalinni, maskiinanik ikiuutilinni, uunnaavinnut atortuutilinni, ikuallaavilinni il.il., tulliuuttunik qatserinermut atortuuteqassaaq aalajangersimasumik ikkunneqarsimasunik, taakku init silataannit ingerlanneqarsinnaassapput:  
- imaluunniit atortuut isugutsertitsisartoq,

- imaluunniit atortuut innermik qamitsisinnaasunik silaannalik,

- imaluunniit atortuut innermik qamitsisinnaasunik aalalik, imerpalasunit annikitsumik toqunartortalinnit aalalik,

- imaluunniit atortuut innermik qamitsisinnaasoq, skummimik annertuumik siammarsinnaasumik atuisoq.

**5.2** Kulbrintimik haloginilorsinnaasunik ikkussukkat nutaat umiarsuarni qatserinermut atorineqarnissaat inertequtaapput.

## **6** Angallatip iluani aamma maskiinap inaani qatserinermut atortussat angallanneqarsinnaasut

**6.1** Angallatip iluani, sulisut inaanni, aamma maskiinap inaani inip angissusaa aaqquissuusaaneralu malillugit pisariaqartinneqartunik amerlassusilinnik qatserinermut atortussanik angallattakkanik peqassaaq, immikkut ittumik siunertamut akuerineqarsimasunik.

**6.2** Maskiinap inaani, katillugu 375 kW-t sinnerlugillu ingerlatsisinnaasumik maskiinalik imaluunniit 750 kW-inik katillugu ingerlatsisinnaasunik maskiinanik ikiuutilik, angallattakkamik qatseruteqassaaq, taamaattorli minnerpaamik marlunnik qatseruteqassalluni.

**6.3** Immikkoortumi 6.2-mi taaneqartuni maskiinap inaani uuliatortumik imaluunniit ikiuutaasumik-uunnaaveqarpat, taava ungasinngisaani allamik angallattakkamik qatseruteqassaaq.

**6.4** Immikkoortumi 6.2 taaneqartumi maskiinap inaata silataani uuliatortumik imaluunniit ikiuutaasumik-kiassaatinut uunnaaveqarpat, taava ungasinngisaani angallattakkamik qatseruteqassaaq.

**6.5** Init nerisassiornermut, kiassanermut imaluunniit nillarsaatinut gassitortunik atortuutilersorneqarsimasut imaluunniit spritti imaluunniit petroliu atorlugu nerisassiornermut sakuutinik atortulersorneqarsimasut, naleqquttumik tigummiartakkamik qatseruteqassapput minnerpaamik 2 kilomik oqimaassusilimmik, aammattaaq iganermut atortussanut ikkussorneqarsimasunut tulluurtumik ikuallattoqarnissaanut sillimmammik tæppeqassalluni.

7 Ikuallattoqartillugu kalerrisaarutit aalajangersimasumik ikkussorneqarsimasut.

7.1 Maskiinap inaani nammineq aallartartoq ikuallattoqartillugu kalerrisaarut ikkunneqarsimassaaq.

7.2 Detektorit suussusaat ileqquusut malillugit akuerisaasimassapput.

### **Malittarisassaq 18 Angallatini 100 ataallugu tamakkerlugu usitussusilinni qatserinermut atortussat**

1 Angallatit tamarmik aaqqissuussaananerit, angissusaat aamma sumiiffik angalasarfiat eqqarsaatigalugu pisariaqartinneqartunik qatseruteqassapput, taakku umiarsuarmi sumiluunniit ataatsimut sakkortuumik qatserisinnaassapput.

2 Qatserinermut atortut pumpit il.il.

2.1 Angallatini tamani maskiinamik ingerlanneqartumik pumpeqassaaq kiisalu ledningeqassalluni qatserinermut atortussanik, slangeqassalluni qatserinermut atortussanik aamma tissaluttaatinik ruujoreqasalluni. Pumpit umiarsuit angissusaannut aaqqissuussaananerannullu tulluurtumik naammassisaqarsinnaassapput, aamma akunnermut  $2,5 \text{ kg/cm}^2$ -mi 15 kubikmeterinit nalinginnaasumik annikinnerussanatik.

2.2 Slangit qatserinermut atortussat illersukkami inissinneqarsimassapput aamma sapernangitsumik tikinneqarsinnaassallutik ruujorinut kalaanimit sapinngisaq tamaat qanittumiisillugit.

3 Ikuallattoqartillugu qatserinermut atortuutit aalajangersimasumik inissinneqarsimasut.

3.1 Angallatit tamarmik tamarmiusumik 20-mik imaluunniit qaangerlugit usitussusillit motoorip inaani atugassamik qatserinermut atortussat tulliusut ilaannik akuerisaasumik aalajangerlugit inissinneqarsimasumik peqassapput, taakku init taakku silataannit ingerlanneqarsinnaassapput aamma sapinngisaq tamaat ajornaatsumik suliarineqarsimassallutik: - imaluunniit isugutak atorlugu atortuutilerlugit.

- imaluunniit atortuut innermik qamitsisinnaasunik silaannalik,

- imaluunniit atortuut innermik qamitsisinnaasunik aalalik, imerpalasunit annikitsumik toqunartortalinnit aalalik,

- imaluunniit atortuut innermik qamitsisinaasoq, skummimik annertuumik siammarsinnaasumik atuisoq.

3.2 Kulbrintimik haloginiliorsinnaasunik ikkussukkat nutaat umiarsuarni qatserinermut atortussatut inertequtaapput.

4 Qatserinermut atortuutit aalajangerlugit inissitat.

4.1 Angallatit tamarmik tamarmiusumik 20-mik imaluunniit qaangerlugit usitussusillit motoorip inaani atugassamik qatserinermut atortuutinik nammineq aallartittartunik peqassapput, taakku sapinngisaq tamaat ajornaatsumik suliarineqarsimassapput.

4.2 Detektorit suussusaat ileqquusut malillugit akuerisaasimassapput.

5 Innermik qatserutit angallattakkat.

- 5.1 Angallatit tamarmik tamarmiusumik imaluunniit qaangerlugit 20-nik usitussusillit motoorip inaani atugassamik qatserinermut atortussanik nammineq aallartittartunik peqassaaq, imaluunniit taakku saniatigut motooreqarfimmi, angallatip iluani innermut qatserinermut atortoqassalluni, immikkut siunertamut akuerisaasimasunik.
- 5.2 Motooreqarfimmi atugassamik minnerpaamik ataatsimik angallattakkamik qatseruteqassaaq. Aammattaaq motooreqarfiup silataani, ungasinngisaani, assingusumik qatserummik inissiisoqarsimassalluni.
- 5.3 Motooreqarfiup silataani maskiinamik ikiuuteqarpat imaluunniit kissarsuummik uuliatortoqarpat, taava ungasinngisaanni qatserut angallattagaq inissinneqarsimassaaq.
- 5.4 5.4 Angallatip iluani angissusaa aamma aaqqissuussaanera malillugit angallattakkanik pisariaqartinneqartunik arlalinnik qatseruteqassaaq.
- 5.5 5.5. Inini nerisassiornermut, kiassaanermut imaluunniit nillarsaatinut gassitortunik atortuutilersorneqarsimasuni naleqquttumik tigummineqartartumik qatseruteqassaaq minnerpaamik 2 kilomik oqimaassusilimmik, aammattaaq iganermut atortussanut ikkussorneqarsimasunut tulluurtumik ikuallattoqarnissaanut sillimmammik tæppeqassalluni.

## **Immikkoortortaq F Annanniutit**

### **Malittarisassaq 19 Puttaqutit**

- 1 Angallammiittunut inunnut tamanut ileqqusut malillugit akuerisaasimasunik puttaquteqassaaq, aamma taakku saniatigut sulii allanik puttaquteqassalluni angallammiittut 5%-iinut assingusumik.
- 2 Meeqqanik ilaasoqarpat, meeqqanut aammattaaq puttaquteqassaaq, angallammiittut meeqqat minnerpaamik amerlassusaannik amerlassusilinnik. Meeqqatut paasineqartarput inuit 32 kilo tikillugu oqimaassuseqartut.
- 3 Puttaqutit qullernik akuerisaasimasunik pilersorneqarsimassapput.
- 4 Puttaqutit angallatip qaavani karsini imaluunniit sikaavinni, erseqqissumik allassimasuni »PUTTAQUTIT« imaluunniit titartakkami oqaatsimik isummamilluunniit takutitsisumi inissinneqarsimassapput. Sumiiffinni naleqquttuni puttaqutit pillugit uppersaaserlugit atsiorerit pillugit innersuussutigineqartut nivinngarneqassapput.

### **5 Malittarisassaq 20 Atallaat annanniutit**

- 1 Angallatit inummik-angallammit-immamut-nakkartoqarnermut atortussalersorneqarsimasuni, inunnut tamanut, angallammik inuttassatut toqarneqarsimasunut, akuerisanik annanniutinik atallaqassaaq imaluunniit illersuutinik atallaqassalluni.

### **Malittarisassaq 21 Illersuutit atortut kissassusillit**

- 1 Angallatit piffissami 30. septemberimit 1. majip tungaanut angalasartut illersuutinik atortunik kissassusilinnik annanniutip ilaasorisinnaasaatut akuerisaasimasut 10 %-iinik amerlassusilinnut imaluunniit 2-nut nassataqassaaq.

### **Malittarisassaq 22 Nigalinnik puttaqutit annanniutit**

- 1 Angallammi minnerpaamik 2-nik akuerisaasimasunik nigalinnik puttaquteqassaaq annanniutinik. Taamaattoq angallatini 150 sinnerlugu usitussusilinni 4-nik taamaattumik nigalinnik puttaquteqassaaq

annanniutinik. Nigalinnik puttaqutit annanniutit angallammi naleqquttumik inissinneqassapput. Nigalinnik puttaqut annanniutit 30 meterimik immami puttasinnaasumik allunaasalerneqarsimassaaq. Nigalinnik puttaqutit annanniutit allat nammineq ikittartunik qullilersorneqarsimassapput.

### **Malittarisassaq 23 Puttaqummut annanniummut ikisineq**

1 Puttaqummut annanniummut ikisinerit ima aaqqissuunneqartassapput, inuit angallammiittut tamarmik piffissami 10 minutsit ingerlanerini qimarngutinneqarsimassallutik.

2 Puttaqutit annanniutit aamma inummik-angallammit-immamut-nakkartoqarnermut-umiatsiat inuit tamarmik annanniummut ikereernissaatut tungaanut aalajangiusimaneqarsinnaassaaq.

3 Angallatini, immap killinganit 1,5 meterit sinnerlugit portussuseqartuni, annanniummut ikissiffissani tamani, annanniummut tummeqqat allunaasat atugassat pigineqassapput.

4 Angallatini, immap killinganit 4,5 meterit sinnerlugit, annanniummut ikisiffissami portussuseqartuni, inuit ilaasut tamakkerlugit ilaatillugit puttaqutit annanniutit nivinngaaviit imaluunniit kranit atorlugit imarmut aqqarneqassapput.

### **Malittarisassaq 24 Puttaqutit pullanneqarsinnaasut annanniutit**

1 Angallatit inunnut tamanut angallammiissinnaasunut annanniutinik pullanneqarsinnaasunik puttaqusersorneqarsimassapput. Inuit angallammiittut 12 sinnerlugit ilaasoqarpat, puttaqutit pullanneqarsinnaasut annanniutit minnerpaamik marluussapput.

2 Angallatit, puttaqutininik pullanneqarsinnaasunik annanniutinik marlunnik pilersorneqarsimasut, taakku immikkut angallammiittut minnerpaamik inuit affaasa ikiffigisinnaasariaqarpat. Umiarsuit, marluk sinnerlugit puttaqutininik pullanneqarsinnaasunik annanniutillit, annanniutaasa angisussaat aamma inissinneqarfii Søfartsstyrelsenimit akuerineqarsimassapput.

3 Puttaqutit pullanneqarsinnaasut annanniutit, umiarsuit usingiartaatit nunap iluani angalasartut pillugit aalajangersagaq malillugu atortussalersorneqarsimasariaqarput.

4 Puttaqutit pullanneqarsinnaasut annanniutit ima inissinneqarsimassapput, inuit 2-t, annanniummut atortunik atuinerup saniatigut, nukinnik atuivallaarnatik aamma ikiuutinik allanik atortoqarnatik puttaqut pullanneqarsinnaasooq annanniut imarmut aqqarsinnaassavaat sivisunerpaamik 1 minutsip ingerlanerani.

5 Annanniutinut pullanneqarsinnaasunut naqitarutit Søfartsstyrelsenimit akuerineqarsimasunik hydrostatiskimik kaanngarsaammik atortorissaarutilersorneqarsimassapput, taamaalilluni puttaqut pullanneqarsinnaasooq annanniut immami puttasinnaalersillugu aamma nammineq pullassinnaalersillugu, angallat kivippat.

6 Puttaqutit pullassinnaasut annanniutit aamma hydrostatiskimik kaanngarsaatillit piffissami assigiimmik akuttussuseqartumik, taakkuninnga atortussiortup innersuusaanik qaangiingitsumik iluarsaasarfimmit akuerisasimasumit misissorneqartassapput.

7 Puttaqutit pullassinnaasut annanniutit tamakkiisumik imaluunniit ilaannakortumik angallatip nivinngaaviini inissinneqarsimasunik umiatsianik annanniutinik taarserneqarsinnaapput. Taamaassappat taava umiatsiat annanniutit, umiatsianut annanniutinut, aaqqissuussanut aamma annanniutinut ikaarnermut atortussanut »Meddelelser fra Søfartsstyrelsen B«-mi piumasaaqatitut aalajangersakkanik piviusunngortitsimassapput.



## **Malittarisassaq 25 Inummik-angallammit-immamut-nakkartoqarnermut-aaqqissuussinerit**

**1** Angallatit, Søfartsstyrelsenimit inummut immamut nakkarsimasup tungaanut ingerlanissamut aamma inummik immamit qaqitsinnaasutut naleqquttutut nalilerneqartut, umiatsiamik atortussalerneqarsimanissamit pisussaajunnaarsinneqarsinnaapput. Angallatit taamaattut inunnik immap qaavanit qaqitsinissamut naleqquttumik atortulerneqarsimassapput.

**2** Angallatini 150 sinnerlugit usitussusilinni, immikkoortumi 1-imi qulaaniittumut naleqqiullugu umiatsiaqannginnissamit pisussaajunnaarsinneqarsimangitsut, inummik-angallammit-immamut-nakkartoqarnermut-umiatsiamik atortulerneqarsimassapput, taanna ileqqusut atuttut malillugit akuerineqarsimassaaq.

## **Malittarisassaq 26 Ajunaalernermit qullit**

**1** Angallatit, piffissami nal. 18.00 aamma nal. 06.00 akornanni ator neqartartuni, kiisalu umiarsuarni tamani katillugu 150-it sinnerlugilluunnit usitussuseqartuni, ajunaalernermit qullernik pilersorneqarsimassapput, taakku annanniutit piareersarneranni aamma immamut aqqarneranni, kiisalu imarmik aqqarfiannut sunniuteqarluartumik qaammarsaasinnaassapput.

## **Malittarisassaq 27 Ajunaalerluni kalerrisaarutit**

**1** Angallatit kalerrisaarutit kigaallasaatillit 12-it aamma kalerrisaarutit aappaluartumik pujuliortut 2-t nassartassavaat. Kalerrisaarutit suussutsimikkut akuerisaasimassapput aamma tunisassioortup innersussutai malillugit nutarterneqartassallutik, aamma nioqqusiornerup ulluata kingorna kingusinnerpaamik ukiut 4-t qaangiunnerannut. Angallatit, seqernup nuereernerata aamma tarrinnerata tungaanut taamaallaat angalasartut, kalerrisaarutit kigaallasaatilinnik 6-nik aamma kalerrisaarutit aappaluartunik pujuliortunik 2-nik taamaallaat nassarsinnaapput.

3) Angallatip siuanit aquanut takissuseq aamma aquutip ikkusimaffiata kaaviffia nalinginnaasumik taamaallat misissorneqartassapput, nutaamik misissueqqinnernut atatillugu 4) Nalunaarut nr. 387, 7. juli 1969-imeersoq umiarsuarni maskiinanut atortulersuutinut il.il. najoqqutassaq malillugu

### Gassimut atortulersuutit aalajangerlugit ikkunneqarsimasut aamma iganermut sakkuutit sprititortut imaluunniit petroliutortut

#### Malittarisassaq 1 Atuuffii

1 Kapitali una iganermut, kiassaanermut imaluunniit nillorsaatinut atortuutitut gassitortunut tamanut kiisalu iganermut sakkuutitut sprititortunut imaluunniit petroliutortunut atuuppoq, ulloq 1. januar 2017-imi kinguneraniluunniit ikkussuunneqarsimasunut, sunngiffimmi angallatinut malitassamut ilaangitsunut tak. aamma imm. 2.

2 Nerisassiornermut, kiassaanermut imaluunniit nillorsaatinut atortuutitut gassitortut kiisalu iganermut sakkuutitut sprititortunut imaluunniit petroliutortut atortut pioreersut ulloq 1. januar 2017 sioqqullugu ikkunneqarsimasut, aamma malittarisassanik atuuttunik, piviusunnngortitsisut, suli atorineqarsinnaapput.

#### Malittarisassaq 2 Atortuutit gassitortut

1 Atortuutit gassitortut atorineqarsinnaasut gassimik tissortumik atuisuussapput, aamma erngarnermut qaartoornissamullu navianaatit pinaveersaartillugit sananeqarsimassapput ikkussorneqarsimassallutillu, aamma erngarneq pillugu misissorneqarsinnaasariaqarlutik. Atortussat aamma atortut ilaat atorineqartut gassimut atorineqartumut naleqquttuusariaqarput aamma immap sunniutaanik sunnerneqarsinnaangitsunik sananeqaateqartariaqarlutik.

2 Angallatinut minnernut<sup>5)</sup> atortuutit gassitortut pitsaassuseq naleqqussagaq piviusunnngortissinnaasariaqarpaat.

3 Atortuutit gassitortut tamarmik, tunisassiornermut atorineqarfiinut atugassanngorlugit aalajangerneqarsimasut, tunisassiornermut innersuussutai malillugit siunertamut ikkussorneqassapput. Sakkuutit gassitortut tamaasa ataasiakkaarlugit siammarterisummit ingerlavimmut pingaarnermut attavik atorlugu pilersorneqassapput, aamma sakkuutit tamarmik namminneq matusisartumik kalaaneqassallutik. Pitsaasumik silaannarissarfeqassaaq, taamaalilluni erngarnerup aamma ikuallassinnaasut kinguneratut navianartorsiortitsisoqannginniassammat.

4 Sunngiffimmi angallatit tamarmik atortuutit gassitortunik atajuartumik ikkussuiffigineqarsimasut gassip puiaasaanut toqqorsivimmik ineraqasapput immikkoortumik. Ineraq isersimaartarfimmit immikkoortinneqarsimassaaq; aamma tassunga silamit aatsaat isertoqarsinnaassalluni, aamma silamut silaannarissarfeqassaaq, taamaalilluni gassimik aniasortoqassagaluarpat silamut aniasinnaaqqullugu.

5 Gassimut atortuutit tamarmik atajuartussamik ikkussorneqarsimasut gassilerisumit imilerisumillu akuerisaasimasumit imaluunniit assingusumit Sikkerhedsstyrelsenip biilit kalitaani unnuiffiusinnaasunut il.il. atortuutit gassitortunik ikkussuinerneq malittarisassai malillugit ikkussorneqassapput, ikkussorneqareerunillu misilittarneqassallutik.

6 Inini nerisassiornermut, kiassaanermut imaluunniit nillarsaatinut gassitortunik atortuutilersorneqarsimasuni naleqquttumik tigummineqartartumik qatseruteqassaaq minnerpaamik 2 kilomik oqimaassusilimmik, aammattaaq iganermut atortussanut ikkussorneqarsimasunut tulluurtumik ikuallattoqarnissaanut sillimmammik tæppeqassalluni.

### **Malittarisassaq 3 Iganermut sakkuutit sprittitortut imaluunniit petroliutortut**

- 1 Sakkuutit sprittitortut naqitsineq atorlugu ikumasartut atorneqaqqussanngillat.
  - 2 Isumannaallisaanissaq eqqarsaatigalugu atortussanut ikumasinnaasunut ungasissuseq naleqquttoq isumagineqassaaq, makittarissumik nivinngarneqarsimasumut ikumasartup aalanera sianigalugu.
  - 3 Sakkuutit illersorneqarsinnaasumik bakkimut imerpalasumik pitarneqarsinnaanngitsumi atortussami ikuallasinnaanngitsumi 25 mm-inik sinilimmi aalajangersorneqarsimassapput.
  - 4 Ikummatissaq pooqqaaviani uninngasuutigineqassaaq, aamma angallammi annerpaamik 6 literimik spritteqassallunni.
- 5 Iganermut atortussat ikkunneqarsimasut eqqaanni naleqquttumik innermut atugassamik tæppeqassaaq.

### **Malittarisassaq 4 Atortussat angallattakkat**

- 1 Atortussat angallattakkat, gassitortut, sprittitortut imaluunniit petroliutortut umiarsuarni atoqqusaanngillat, taamaattorli aserfallatsaaliuinnermut aamma iluarsaanermut atatillugu atortut atorneqarsinnaallutik.

<sup>5)</sup> EN ISO 10239: Small craft – Liquefied petroleum gas (LPG) systems.